

Gio betg flommas

■ (anr/gns) Taimp da stad è er taimp da grillar. Gist las dus davosas emdas è er ainten las regiuns pì otas la seira anc sto fitg agreabel. Seiras tgi pudagn star aint igl curtgign u sen lobgia cun temperaturas pì ampernevas vainsa betg schi bleras. È chegl igl cass, alloura vign er savens cumbinada la seira cun ena bela

grillada. Tar chella totgan bagn liongias da tottas sorts. *David Steier*, igl patrung dalla Mazlareia Peduzzi, el dei tgi per grillar ins dess piglier carvung. Gio betg grillar sen las flommas, mabagn spitgier anfignen tg'ins vegia en bel barnia.

> PAGINA 8

Discuors cun Roger de Weck

■ (anr/bcs) D'incuort ha gnü lö a l'Hotel Guarda Val a Scuol ün discuors al chamin cun **Roger de Weck** chi abita a Turich ed a Sent. Il possessur da l'hotel, *Kurt Baumgartner*, vaiva invidà al publicist ed anteriur directur da l'SRG SSR ad ün discuors public. Il moderatur *Andri Franziscus* ha discurre cul giast e provà d'indreschir la tenuta da *Roger de Weck*. Sco cha quel ha dit as chat-

ta el fich bain in Engiadina Bassa ed abita la mità da seis temp in sia chasa a Sent. Actualmaing lavura el vi da seis cudeschi chi dess cumparair prosmamaing. Roger de Weck es persvas cha per avair success stopcha la regiun nüzziar sinergias e schanzas e collavurar eir cullas regiuns vaschinas da sur cunfin Tirol e Vnuost.

> PAGINA 9



Roger de Weck ha quintà da sia vita e da sia segunda patria Sent. MAD

Sogn Placi

La gronda festività en Surselva

DA GIUSEP CAPAUL / ANR

■ **S. Placi e s. Sigisbert** – il di commemorativ dils fundatur dalla claustra da Mustér – croda calendaricamein adina sils 11 da fenadur. Pli baul vegneva la festività era celebrada solemnamein gest quei di. Ei setracta tier s. Placi bein dalla pli gronda manifestaziun religiusa en Surselva. Dapi onns vegn ella anticipada sin la dumengia avon. Cul di da fiasta va mintgamai era igl onn dalla scola claustrala a fin. Dumengia vargada eisi pia stau s. Placi. Era sch'igl ei en emprema lingia la fiasta dalla claustra ha ella buca saviu vegnir celebrada uonn ella vasta baselgia claustrala. Quella ei dapresent en restauraziun. Las lavurs s'avonzan stupent, aschia che l'inauguraziun cun la consecraziun d'in niev altar ha liug uonn da s. Martin, patrung dalla baselgia claustrala, ils 11 da november. La fiasta da s. Placi ei era sesplegada uonn el rom tradiziunal. Celebrant principal dalla messa pontificala ei igl avat da Nossadun-



Gruppa da dunnas che portan la statua da Nossadunna.

FOTO TH. BIELER

naun, msgr. *Urban Federer*, staus. Siu motto: Nus festivein la cardientscha. Ina messa da *Joseph Haydn* – interpretada dil chor claustral, orchester, organist, solistas e solists – ei stada ton edificonta sco elevonta. La

processiun ei ida naven dalla baselgia da S. Gions sin claustra. Avon la porta claustrala ha avat Urban dau la benedicziun. Concludiu ei vegniu cun las usitadas salvias a dignitaris e magistrats. Igl ei stau in s. Placi cun bia

glieud, in solemn survetsch divin e bellezza processiun. Quei tut s'enretscha en ina liunga cadeina da festivitads pils fundatur dalla claustra.

> PAGINA 3

Duas tiarzas ein dunnas

■ (anr/abc) Igl onn 2018 ein ils 94 letgs dalla Casa da vegls e da tgira Glion stai occupai per 96,67 pertschien. Igl onn vargau ei la casa stada duront treis jarnas ella curontina. Daferton ei la crisa dil norovirus dagitg dumignada, per la gronda casa da vegls e da tgira en Surselva eis ei denton stau ina pulita sfida. El seigi engrazieivels ch'ei seigi gartegiau da dumignar quella, pigl auter seigi igl onn 2018 numnadamein staus in fetg legreivel,

La pissiun d'encurir bulius

Schar controllar dils experts ei meglier che riscar

DA SUSI ROTHMUND / ANR

■ **La stagiun da bulius ha entschiet gia cuort suenter che la neiv ei stada luada.** La primavera anflan quels ch'enqueran el dretg liug numnadamein murachels. Quels bulius tumpriivs sezuppan denton aschi bein ch'igl ei nuota semperl d'anflar els. La redactura ha astgau accompagnar ils control-

laders da bulius dalla Surselva *Lia Heini-Piacentini* ed *Egmont Heisch* sin ina tura. Quei ch'els san raquintar dalla veta dils bulius ei interessant e fascinont e cun lur pissiun pils bulius capeschan ei d'animar per quei hobi che fa bein a tgiarp ed olma. Premess ch'ins maglia la finfinala sulet bulius gudibels. Mo per che quei gartegi ein els gie cheu, ils controlladers. En

Surselva dat ei treis posts ufficials per la controlla da bulius, numnadamein a Glion, Laax e Mustér (risguardar uras d'avertura). Bulius san ins denton era schar controllar – tenor cunvegnientscha per telefon – en Val S. Pieder, a Cumbel ni a Siat. Las controllas da bulius ein gratuitas.

> PAGINA 5